

Suliniutini angisuuni illuliortiternernik sanaartornernillu suliassat pillugit Inatsisartut inatsisaanni nr. 25, 18. december 2012-imeersumi, § 6 imm. 1-imut allannguutissamik, pilersaarusiap sanaartornermut aningaasartuutissaasa 600 millionit kronit qaangeraangagit suliniutitut angisuutut isigineqarsinnaasunnngorlugu, kingusinnerpaamik UKA2019-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siumup Inatsisartuni gruppia)

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Siullermeerneqarnera

Suliniutini angisuuni illuliortiternernik sanaartornernillu suliassat pillugit Inatsisartut inatsisaata allanngortinnissaa pillugu siunnersuut Naalakkersuisut tusarniaassutigalugu nassiussimavaat.

Siunnersuut UPA2019-imi oqaluuserisassanngortikkumallugu saqqummiunniarneqartoq § 6 imm. 1-imi allannguummik imaqarpoq, taamalu suliniutinut angisuunut inatsimmi malittarisassat malillugit sanaartornissamik suliniutip neqeroorutigittinnissaanut aningaasat killigittat 5 mia. koruuniniit 1 mia. koruuninut allanngortinneqassalluni.

Allannguutip taassuma aatsitassarsiornermik suliniutinik neriunaateqarnerusunik amerlanernik nunani tamalaani unammillersinnaanerusunik atugassaqartitsilernissaq kingunerissavaa. Tamatuma sunniuteqaatigissavaa aatsitassarsiornermi suliniutit amerlanerusut aningaasalersorneqarsinnaalernissaannut. Kalaallit Nunaanni erngup nukinganik nukissiorfiliorfissatut piukkunnaateqartut nunani tamalaani aningaasaliisartunut ussasaarutiginnissaat Naalakkersuisut nukissiuuteqarnermut immikkoortumut pilersaarutaanni ilaapput. Suliniutini angisuuni aningaasaliissutissat qaffasissusissaasa appasinnerulersinneqarnera aamma periarfissanik pitsaanerulersitissaaq aningaasaliisussarsiornermi, nunatsinni erngup nukinganik iluaquteqarluni ingerlatsinerup ineriartortinnissaani.

Taamaalilluni suliniutini angisuuni illuliortiternernik sanaartornernillu suliassat pillugit Inatsisartut inatsisaata allanngortinnissaa pillugu aalajangiiffigisassatut siunnersuummi tunngaviusut aamma Naalakkersuisut siunnersuutaannut tunngaviusut annertuumik assigiissuteqarput.

Suliniutinut angisuunut inatsit aamma siunertaqarpoq nunatsinni suliffeqarnermi sulisussaqaarniarnermi killeqartumik periarfissani aporfissanik pinngitsuuniarnissamik, erngup nukinganik iluaquteqarniarluni suliniutini aamma aatsitassarsiornermi. Ullumikkut nunatsinni suliffissaaleqineq oqaluttuarisaanitsinni appasilluinnartumik inissisimavoq. Taamaattumillu Naalakkersuisut tunngavilersorluakkatut isigaat aningaasat killissaasa appasinnerulersinneqarnissaat.

Taamaattumillu siunnersuut Naalakkersuisut tapersensorpaat, Naalakkersuisullu inassutigaaq siunnersuut akuersissutigineqassasoq imatut allannguuteqartillugu:

“Inatsisartut aalajangiiffigisassaattut siunnersuut, Naalakkersuisut peqquneqassasut kingusinnerpaamik UKA2019-imi siunnersuuteqarnissamut allannguutissamik, § 6, imm. 1-imi, suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersumi, taamalu suliniutitut angisuutut isigineqartassalluni suliniummi sanaartornissamut aningaasartuutissat 1 mia. kr.-it qaangersimagaangagit.”

Taamatut oqaaseqarlunga neriuppunga Inatsisartuni oqallilluartoqassasoq.